

04 FEB 1999

Mohamed-Sabah

PEMBAHAGIAN KERUSI DI SABAH AKAN DILAKUKAN SECARA ADIL

JOHOR BAHRU, 4 Feb (Bernama) -- Setiausaha Agung Barisan Nasional (BN), Datuk Seri Mohamed Rahmat hari ini berkata pembahagian kerusi antara parti komponen BN dalam pilihan raya negeri Sabah akan dilakukan secara adil.

"Kita akan berlaku adil dalam soal pembahagian kerusi dan kita akan pertahankan itu," katanya kepada pemberita selepas menghadiri majlis perjumpaan tertutup Timbalan Perdana Menteri Datuk Seri Abdullah Ahmad Badawi dengan Badan Perhubungan Umno Negeri Johor di sini.

Bagaimanapun, beliau berkata peranan Umno sebagai tunjang dan pengasas kepada kerajaan negeri Sabah akan dipertahankan, oleh itu, Umno akan memperolehi jumlah kerusi yang lebih.

"... orang sudah banyak percaya kepada Umno, berikutan keadilan yang dibawa oleh Umno dan dari dasar kongsi kuasa yang dibawa oleh Umno, diterima baik oleh rakyat Sabah," katanya.

Mohamed, yang juga Menteri Penerangan, berkata jika Umno memperolehi jumlah kerusi yang besar ia akan meningkatkan keyakinan pengundi terhadap penubuhahn sebuah kerajaan yang adil seperti di Semenanjung.

Mohamed berkata Umno tidak akan bertanding di kawasan yang parti itu tidak kuat atau kawasan yang majoritinya terdiri daripada pengundi bukan Islam.

"Itu kita tidak boleh. Tetapi kita juga akan timbang mana-mana kawasan yang kita fikir jumlah (pengundi) Melayu majoriti dan atas semangat setia kawan BN, Umno akan berkorban untuk memberikan kerusi itu kepada parti komponen yang lain seperti di Semenanjung.

"Oleh itu, untuk menentukan terdapat kestabilan di Sabah, peranan Umno sebagai tunjang kerajaan negeri harus dipertahankan," katanya.

Ketika ditanya bila Dewan Tertinggi BN akan bermesyuarat untuk menentukan pembahagian kerusi pilihan raya negeri Sabah, Mohamed berkata perkara itu akan diputuskan oleh Perdana Menteri Datuk Seri Dr Mahathir Mohamad.

Dalam pilihan raya 1994, BN menang 23 kerusi sementara Parti Bersatu Sabah (PBS) menawan 25 kerusi, tetapi BN kemudiannya membentuk kerajaan negeri setelah sebahagian besar anggota dewan undangan negeri dari PBS menyertai BN.

-- BERNAMA

MKO RI